

ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ՎԻՏԵՆԲԵՐԳԻ ԿՈՆՖԵՐԱՆՍԻ ՄԱՍՆԱԿՑՆԵՐԻՆ

Ապրիլի 23-ին, Սուրբ Պատարագից հետո, Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց 2005 թ. Գերմանիայում կազմակերպված Վիտենբերգի կոնֆերանսի 30 մասնակիցների, որոնք ուխտի էին եկել Հայաստան՝ ուղեկցությամբ պրոֆ. Հերման Հուլցի, «Լեփսիուսի տուն-թանգարան. Պոտսդամ» միության առաջին նախագահ Հ. Շուլցի և Վիտենբերգի ակադեմիայի տեսուչ Ջ. Գոպֆերտի:

Ողջունելով ուխտավորների այցը Մայր Աթոռ Սուրբ Էջմիածին՝ Ամենայն Հայոց Հայրապետն իր գնահատանքը հայտնեց նրանց այն ծառայությունների համար, որ մատուցում են հայ ժողովրդին և ողջ աշխարհին՝ մարդկային կյանքից ներս խարսխելով աստվածսիրության և մարդասիրության արժեքները: *«Հաճելի էր մեզ, որ աղոթակից եղաք այսօր սրբազան արարողության ընթացքին, և մեր միությունը կատարյալ եղավ աղոթքով: Մենք միասնաբար մեր աղոթքը երկինք բարձրացրեցինք՝ մեր մտածումները հառած ապրիլ 24-ի ողբերգություններին, և Աստծուց հայցեցինք, որ խաղաղ պահի աշխարհը, սիրո և եղբայրության մեջ, որպեսզի ազգերը հեռու մնան նման չարիքներից ու ողբերգություններից»*, - ասաց Նորին Սրբությունը:

Ուխտավորները, ընտրելով իրենց Հայաստան այցի ապրիլյան այս օրերը, նպատակ ունեին նաև մասնակցելու ապրիլ 24-ին Մեծ եղեռնի բյուրավոր նահատակների հիշատակի արարողություններին: Հարկ է նշել, որ պրոֆ. Հերման Հուլցի կողմից կատարված Յ. Լեփսիուսի արխիվների ուսումնասիրությունը հիմք հանդիսացավ 2005 թվականին Գերմանիայի Բունդեստագում 1915 թ. Հայոց ցեղասպանության վերաբերյալ փաստաթղթի ընդունմանը:

Հանդիպմանը ներկա էր Մայր Աթոռի Միջեկեղեցական հարաբերությունների գրասենյակի վարիչ Հոգեշնորհ Տ. Հովակիմ վրդ. Մանուկյանը:

*ՄԱՅՐ ԱԹՐՈՒ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*